



Deponenti i štediša Bobar banke slave Mektića, tužioce i inspektore iz SIPA KO JE KR IV, NEKA I ODGOVARA

Organi Bobar banke su se oglušili na naše sugestije, ističe Tučić • Injac i bankari-prevaranti su nas unesrećili

Nakon što su likvidacijom Bobar banke nestali milioni maraka, kako pravnih lica tako i običnih građana, akcija Lavina daje tračak nade da će vratiti novac koji je ostao u ovoj banci. Među oštećenima sa najvećim iznosima je i Fond zdravstvenog osiguranja Brčko distrikta, čija su potraživanja oko 14,7 miliona KM po osnovu depozita.

(Ne)saradnja

Direktorica Fonda Aleksandra Tučić kaže za Oslobodjenje da ko je za šta odgovoran, treba i da odgovara.

- Ne znam jesmo li najveći potražioc, ali jesmo sigurno među najvećim bivšim komitentima te banke. Ono što je bitno jeste da smo jako mnogo informacija davali upravo u pogledu osnova sumnje da postoje određene radnje koje su nekakvim nepravilnim poslovanjem dovele do svega ovoga, kaže Tučić.

Dodaje da je Fond, upravo od momenta saznanja da su sredstva osiguranih lica postala nedostupna, odmah pristupio prikupljanju dokumentacije kako bi se iznašlo rješenje za nastalu situaciju.

- Kako je to bilo, nažalost, nemoćuće od Agencije za bankarstvo i organa banke, mi smo, naravno,

tražili informacije od drugih organa. Tako da ono što je jako bitno, mi smo kao oštećena strana i kao neko ko je prikupljao dokumentaciju na osnovu izvještaja do kojih smo dolazili nešto preko Transparency Internationala, nešto sami, prosljedili nadležnim organima. Iskreno se nadam da će se to rasvijetliti i da će se utvrditi ko je odgovoran za nestanak, ne samo sredstava Fonda nego i ostalih institucija i fizičkih lica, kaže Tučić, izrazivši nadu da će kapaciteti i nadležni organi koji se bave istragom rasvijetliti ove radnje.

Sugestije

- Mi smo i ukazivali i nudili nekakva rješenja. Međutim, organi banke sad u likvidaciji su se oglušili na sve naše sugestije i prijedloge u smislu obećanja likvidacione mase i namirenja svih povjerilaca Bobar banke. Evo, očigledno je da su se organi odlučili pozabaviti tim i mi smo jako zadovoljni, kaže Tučić.

Štediša se jučer u otvorenom pismu ministru sigurnosti BiH Draganu Mektiću izrazile iskrene čestitke i zahvalnost kako njemu tako i neimenovanim pojedincima Tužilaštva BiH i inspektorima SIPA za radnje koje su "pre-

duzeli u borbi protiv kriminala i korupcije u tzv. bankarskom sektoru Srpske".

- Unijeli ste radost u hiljade domova širom nesretnog RS-a, koje su Slavica Injaci bankari-prevaranti unesrećili, od kojih su desetine i umrle od stresa, zbog prevara u datim kreditima, na teret žirantata, navodi se u pismu. **E. BARIMAC**

Likvidacioni postupak

U martu 2015. likvidacioni upravnik Mile Maksimović izjavio je da deponenti i povjerioci Bobar banke potražuju oko 289 miliona KM, te da je od ukupnih potraživanja priznato 229 miliona.

U JU Zavod za zapošljavanje RS-a, koji je oštećen za oko 12,3 miliona KM po osnovu depozita, kazali su nam da su prijavili svoja sredstva likvidacionom upravniku Bobar banke, koja su priznata u punom iznosu.

- Na osnovu pozitivnih zakonskih propisa, očekujemo da će sva potraživanja Zavoda biti riješena po okončanju likvidacionog postupka, naveli su iz Zavoda.



Stediše iz Bobar banke poslale otvoreno pismo